

立典契人下後垵鄉何媽盖。有承父鬮分园壹坵，受種九升，坐落土名溝沙墘，東至自己园，西至溝，南至溝，北至盧家园，四至明白為界。今因乏錢費用，托中引就與後浦灰埕許輕論官處典出時用清錢捌仟文，其錢即日全中收訖。园付錢主掌管，不敢阻当。限至三年，每年貼納米錢叁拾文，倘契面錢取贖原契，不得刁难。保此园係是自己承父物業，與房親叔兄弟侄無干，亦無重張典掛他人為碍，如有不明等情，典主出頭抵当，不干錢主之事。恐口無憑，立典契壹紙，付執為存照。

知見人 男金榜

同治拾壹年拾貳月

日立典契人 何媽盖

作中人 何占鰲

代書人 何廷進

